
ТУМАНДА АХБОРОТ КУТУБХОНА МАРКАЗИ ОЧИЛДИ

Данғара туман марказида замонавий кўринишдаги 150 нафар фойдаланувчи ўрнига эгв Ахборот кутубхона маркази янги йил арафасида ўз фаолиятини бошлади.

Мамлакатимиз Президенти Ш.Мирзиёевнинг 2019 йил 12-13 июн кунлари Фарғона вилоятига ташрифлари чоғида берган топшириқларига асосан 3 қаватдан иборат 32 мингдан ортиқ китоб фондига эга бўлган кутубхона бугун китобхонларга хизмат кўрсатяпти.

-Мен энг яқин дўстимни яна топиб олдим, - дейди нафақадаги кутубхоначи Жамилахон Эхсонова.- 72 ёшимда яна бир бор ишондимки, китоб бу офтоб экан. Янги кутубхона очилганлигини эшитиб келдим. “Анна Каренина” китобини ўқишга олдим.

Ахборот кутубхона марказида 14 нафар мутахассис ходимлар 2596 нафар китобхонларга хизмат кўрсатиб келмоқда.

-Иш вақтини икки сменада ташкил этдик. Эрталаб соат 8 дан кеч соат 20:00 гача китобсеварлар учун эшигимиз очиқ,-дейди кутубхона маркази директори Сайёрахон Холмирзаева.-Бу ерда ўқув зали, интернет ресурслар зали, барча фан соҳаларига доир китоблар, илмий-оммабоп, ижтимоий-сиёсий , бадиий адабиётлар, кичик ёшдаги китобхонлар учун адабиётлар мавжуд. Бундан ташқари имконияти чекланган фойдаланувчиларга ҳам алоҳида шарт-шароитлар яратилган. Улар учун махсус китоб стеллажлари, курсилар, компьютердан фойдаланишлари учун махсус ўринлар яратилган.

Қувонарлиси, бугун Ахборот кутубхона маркази туман аҳолисининг етти ёшдан етмиш ёшгача бўлган аҳолиси учун зиё ва маърифат улашмоқда.

Фарғона вилояти ҳокимлиги Ахборот хизмати

М. Қодиров олган суратлар

2020-01-07 18:46:31